



Broj:
Sarajevo, __.__. 2019. godine

Na osnovu člana 26. stav 1. tačka 2. i člana 74. stav 1. Statuta Grada Sarajeva ("Službene novine Kantona Sarajevo", broj 34/08 – prečišćeni tekst), Gradsko vijeće Grada Sarajeva, na sjednici od __.__. 2019. godine, donijelo je:

ZAKLJUČAK

(prijedlog)

1. Gradsko vijeće Grada Sarajeva je razmotrilo Nacrt Programa podizanja spomenika od značaja za Grad Sarajevo za 2020. godinu koji je u prilogu ovog akta i upućuje ga u javnu raspravu u trajanju od 30 dana od dana upućivanja Nacrta Programa u javnu raspravu.
2. Subjekti u javnoj raspravi su klubovi gradskih vijećnika i drugi subjekti koji iskažu interes.
3. Ovaj zaključak, čiji sastavni dio je utvrđeni Nacrt Programa podizanja spomenika od značaja za Grad Sarajevo za 2020. godinu, tokom trajanja javne rasprave, biti će javno dostupan na službenoj internetskoj stranici Grada Sarajeva, putem poveznice istaknute na naslovnoj stranici pod naslovom "Poziv za javnu raspravu o Nacrtu Programa podizanja spomenika od značaja za Grad Sarajevo za 2020. godinu."
4. Primjedbe, prijedlozi i sugestije iznesene u diskusijama radnih tijela Gradskog vijeća i gradskih vijećnika, iznesene na sjednici Gradskog vijeća, pri razmatranju Nacrta Programa podizanja spomenika od značaja za Grad Sarajevo za 2020. godinu, tretirat će se kao prilog javnoj raspravi.
5. Za organizaciju i vođenje javne rasprave određuje se Gradonačelnik i Komisija za spomenike Gradskog vijeća Grada Sarajeva.

PREDSJEDAVALJUĆI GRADSKOG VIJEĆA

Dr. Igor Gavrić



*PROGRAM
PODIZANJA SPOMENIKA OD ZNAČAJA ZA GRAD SARAJEVO
ZA 2020. GODINU
(nacrt)*

*Predlagač : Gradonačelnik
Obrađivač : Gradska služba za urbano planiranje,
investicije, stambene i komunalne poslove*

Sarajevo, septembar 2019. godine



Na osnovu člana 26. stav (1), tačka 2. Statuta Grada Sarajeva („Službene novine Kantona Sarajevo“ broj: 34/08), i člana 11. stav 3. Odluke o spomenicima od značaja za Grad Sarajevo („Službene novine Kantona Sarajevo“, 34/19) Gradsko vijeće Grada Sarajeva, na svojoj sjednici održanoj _____ donijelo je

(nacrt)

PROGRAM
PODIZANJA SPOMENIKA OD ZNAČAJA ZA GRAD SARAJEVO
ZA 2020. GODINU

I

Programske aktivnosti u 2020. godini na podizanju spomenika od značaja za Grad Sarajevo kojima je Grad investitor su kako slijedi.

1. Spomen obilježje žrtvama na Kazanima

Proces javne nabavke Idejnog rješenja spomeničkog kompleksa (spomenika i vanjskog uređenja sa pristupnom stazom) na lokalitetu Kazani, s ciljem dodjele nagrada za tri prvoizabrana rada u visini od 4.000,00KM se realizira, u skladu s Planom javnih nabavki Grada Sarajeva za 2019. godinu. Po dobivanju odgovarajućeg idejnog rješenja, uslijedit će nabavka izvedbenog projekta spomeničkog kompleksa, a zatim i usaglašavanje budućeg projektnog rješenja, te početak izvođenja radova.

S ciljem provođenja inicijative Gradskog vijeća Grada Sarajeva za podizanje Spomen obilježja žrtvama na Kazanima, Federacija BiH je doznala Gradu Sarajevu iznos od 5.000,00KM.

Po osnovu ovih sredstava, Grad Sarajevo je izvršio nabavku detaljnog geodetskog snimka lokaliteta, a što predstavlja osnovu za izradu tenderske dokumentacije za nabavku idejnog rješenja spomen obilježja, čiji bitan dio predstavlja uređenje lokaliteta i organizacija odgovarajućeg pristupa.

Dio dobivenih sredstava je u funkciji pribavljanja idejnog rješenja kompleksa. Za izradu izvedbene projektne dokumentacije i početak izvođenja radova, sredstva se planiraju u Budžetu Grada Sarajeva za 2020. godinu u okviru zbirne stavke od 200.000,00KM koliko Grad Sarajevo planira izdvojiti za podizanje spomenika (pripadajući iznos za 2020. godinu će se procijeniti po prihvaćanju idejnog rješenja, a definirati po izradi izvedbenog projekta).

2. Spomenik Dariju Džamonji, Kemal Montenu i Esadu Arnautaliću

Proces javne nabavke Idejnog rješenja spomeničkog kompleksa (spomenika i vanjskog uređenja) na lokalitet Spomen parka Mirzi Delibašiću i Davorinu Popoviću, tako da se lokalitet u cjelini reorganizira u spomen istaknutim javnim djelatnicima koji su obilježili jedno vrijeme u Gradu Sarajevu, a s ciljem dodjele nagrada za tri prvoizabrana rada u visini od 4.000,00KM, realizira se kako je to programirano za 2019. godinu.

Po dobivanju odgovarajućeg idejnog rješenja, uslijedit će nabavka izvedbenog projekta spomeničkog kompleksa. Za izradu izvedbene projektne dokumentacije i početak izvođenja radova, sredstva se planiraju u Budžetu Grada Sarajeva za 2020. godinu, u okviru zbirne stavke od 200.000,00KM (pripadajući iznos za 2020. godinu će se procijeniti po prihvaćanju idejnog rješenja, a definirati po izradi izvedbenog projekta).

3. Spomen obilježje Kralju Tvrtku I Kotromaniću

Grad Sarajevo će u 2020. godini provesti procedure nabavke Idejnog rješenja spomenika Kralju Tvrtku, na lokalitetu koji će (među ponuđenim) proizaći pri odabiru idejnog rješenja.

Za pribavljanje idejnog rješenja, te eventualnu izradu izvedbene projektne dokumentacije i početak izvođenja radova, sredstva se planiraju u Budžetu Grada Sarajeva za 2020. godinu u okviru zbirne stavke od 200.000,00KM.

4. Spomen obilježje za 25. pripadnika Zelenih beretki koji su poginuli 08.06.1992. godine u akciji oslobađanja kote 1162 - Vidikovac

Grad Sarajevo planira podići spomen ploču na objektu izlazne stanice Trebevičke žičare s imenima 25. pripadnika Zelenih beretki koji su poginuli 08.06.1992. godine u akciji oslobađanja kote 1162 – Vidikovac, a po prijedlogu koji je Gradu Sarajevu uputilo Udruženje organizatora otpora, veterana rata, dobrovoljaca, prvoboraca i branioaca “BOSNAE – ZELENE BERETKE”.

Za izradu projektne dokumentacije i postavljanje ploče, sredstva se planiraju u Budžetu Grada Sarajeva za 2020. godinu u okviru zbirne stavke od 200.000,00KM.

II

Programom rada Gradskog vijeća Grada Sarajeva za 2019. godinu planirano je razmatranje Programa podizanja spomenika od značaja za Grad Sarajevo 2020. godine i to u redovnom postupku, tako da se nacrt akta razmatra u septembru mjesecu.

Odlukom o spomenicima od značaja za Grad Sarajevo, propisano je da se sredstva za podizanje spomenika od značaja za Grad Sarajevo kojima je Grad Sarajevo investitor, planiraju na osnovi godišnjeg Programa podizanja spomenika od značaja za Grad Sarajevo kojima je Grad Sarajevo investitor, a koji donosi Gradsko vijeće na prijedlog Gradonačelnika. Program se zasniva na inicijativama koje su dobile podršku Gradskog vijeća i za koje je Komisija za spomenike utvrdila da su inicijative za podizanje spomenika od značaja za Grad Sarajevo, te uputila Gradonačelniku na obradu s ciljem da Grad Sarajevo bude investitor podizanja spomenika.

Nacrtom Programa koji se razmatra predlaže se nastavak aktivnosti na realizaciji započetih projekata u 2019. godini i to izrada projektne dokumentacije i početak izvođenja radova za podizanje Spomen obilježje žrtvama na Kazanima i Spomenika Dariju Džamonji, Kemal Montenu i Esadu Arnautaliću.

Grad Sarajevo je raspisao Konkurs za izradu Idejnog rješenja spomeničkog kompleksa (spomenika i vanjskog uređenja sa pristupnom stazom) na lokalitetu Kazani.

Poslije izbora tri nagrađena idejna rješenja i idejnog rješenja na osnovu kojeg će se realizirati nabavka usluge izrade izvedbenog projekta, uslijedit će postupak nabavke s ciljem dodjele ugovora o izvođenju radova.

Podizanjem spomenika ima za cilj odati počast sarajevskim civilima koji su tokom opsade Sarajeva 1992. i 1993. godine na lokalitetu jame Kazani na Trebeviću dovedeni i ubijeni, a jama je korištena kao grobnica tamo ubijenih žrtava. Tačan broj žrtava još uvijek nije poznat, a iz jame na Kazanima nakon rata su izvađeni posmrtni ostaci 29 osoba. Podizanje spomenika ima za cilj i skidanje „hipoteke“ sa odbrane Sarajeva i pripadnika Armije RBiH, jer je za zločine na Kazanima, pred Kantonalnim sudom u Sarajevu, osuđeno 14 pojedinaca nakon što su bosanskohercegovačke vlasti 26. oktobar 1993. organizirale akciju „Trebević“ kako bi se zaustavili ovi zločini i obračunalo sa zločincima u svojim redovima (tokom akcije je poginulo devet policajac koji su u njoj sudjelovali).

Podizanjem spomenika u parku preko puta FIS-a ima za cilj odati počast građanima Sarajeva koji su obilježili vrijeme procvata sarajevske inventivnosti i kreativnosti i postizanja značajnih rezultata, a posebno u umjetnosti, kulturi i sportu, u drugoj polovici prošlog stoljeća, tako da se pored

spomenika Mirzi Delibašiću i Davorinu Popoviću, na ovom mjestu podignu spomenici i Dariju Džamonji, Kemal Montenu i Esadu Arnautaliću, za što su inicijative prihvaćene, te predvidi prostor za podizanje spomenika i drugim istaknutim sugrađanima koji su bili njihovi savremenici i svojim djelovanjem obilježili ovo doba. Cilj je i urediti postojeći prostor parka tako da bude jednostavno i sigurno dostupan svim kategorijama građana, postojeću fontanu zamijeniti novom, usklađenom sa postavljenim ciljevima i prostornim okruženjem, te postojeće spomenike uklopiti u novo rješenje ili predložiti potpuno novi pristup.

Komisija za spomenike je svojim zaključkom utvrdila da je podizanje „Spomen obilježja Kemal Montenu i Dariju Džamonji“ u parku kraj Predsjedništva BiH, a preko puta FIS-a, podizanje spomenika od interesa za Grad Sarajevo u skladu s članom 2. Odluke o podizanju spomenika od značaja za Grad Sarajevo („Službene novine Kantona Sarajevo“, broj 12/11 i 21/16), te zatražila da Gradonačelnik poduzme mjere za preispitivanje odnosa u prostoru, te statusa predmetnog parka u cjelini sa svih aspekata koji utiču na buduće rješenje, iniciranjem izrade donošenja urbanističkog rješenja kojim će se jasno definisati spomenički kompleks, usklađen s važećom planskom dokumentacijom višeg reda (kao što je to potrebno uraditi za realizaciju inicijative za podizanje spomenika Esadu Arnautaliću u istom parku). Komisija za spomenike je tada iskazala svoje očekivanje da Grad Sarajevo ovu inicijativu Gradskog vijeća dalje obradi u skladu s članom 6. Odluke o podizanju spomenika od značaja za Grad Sarajevo („Službene novine Kantona Sarajevo“, broj 12/11 i 21/16) i dostavi Komisiji za spomenike inicijativu sa kompletnom dokumentacijom, potrebnom za dalje postupanje Komisije.

S tim u vezi, a u skladu s Programom podizanja spomenika u 2019. godini, pripremljen je konkurs za izradu Idejnog rješenja spomeničkog kompleksa (spomenika i vanjskog uređenja sa fontanom) na lokalitetu parka preko puta FIS-a. Konkurs će rezultirati izborom tri nagrađena idejna rješenja i idejnog rješenja na osnovi kojeg će se izraditi izvedbeni projekt, a koji će biti osnova za ugovaranje izvođenja radova.

Iako inicijativa za podizanje spomen obilježja Kralju Tvrtku I Kotromaniću koja je ocijenjena inicijativom za podizanje spomenika od interesa za Grada Sarajevo, nije bila kompletna, ocijenjeno je da bi Grada Sarajevo kao glavni grad, mogao preuzeti ovu inicijativu i da bi trebao biti investitor podizanju ovog spomenika.

Podizanje spomenika ima za cilj obilježiti vladavinu, najprije bana, a zatim kralja Bosne - kralja Tvrtka I Kotromanića (1338 - 1391). Povjesničari evidentiraju da je za njegove vladavine država bila politički stabilna i da je tada ostvaren značajan kulturni i duhovni napredak, te da se razvijaju gradovi, trgovina i rudarstvo. Neki historičari bilježe da se, odmah nakon Tvrtkovog krunisanja, pojavilo i prvo kovanje zlatnog novca na južnoslavenskim prostorima. Evidentira se ulazak zlatnog ljiljana (*lilium bosniacum*) u bosansku heraldiku za njegove vladavine. Povijesni izvori navode na zaključak da je za vrijeme Tvrtkove vladavine, Bosna bila najsnažnija južnoslavenska zemlja tog doba, a sam Tvrtko najveći vladar u historiji srednjovjekovne Bosne.

U Nacrt Programa je uvršteno i podizanje spomen ploče za 25. pripadnika Zelenih beretki koji su poginuli 08.06.1992. godine u akciji oslobađanja kote 1162 – Vidikovac, a po prijedlogu koji je Gradu Sarajevu uputilo Udruženje organizatora otpora, veterana rata, dobrovoljaca, prvoboraca i branioca “BOSNAE – ZELENE BERETKE”. Grad Sarajevo bi bio investitor za podizanje ove spomen ploče.¹

PREDSJEDAVALJUĆI GRADSKOG VIJEĆA

Dr. Igor Gavrić

¹ Ovaj prijedlog je uvršten uvjetno, ukoliko Komisija za spomenike ocijeni da se radi o podizanju spomen obilježja događaju od značaja za Grad Sarajevo, a što, prema kriterijima iz gradskog propisa, ne bi trebalo biti upitno..